

**TRUSTAKTE GEREFORMEERDE KERKE
EMERITAATSVERSORGINGSTRUST
TRUSTOORENKOMS (Acta 2003, 801)**

AANGEGAAN DEUR EN TUSSEN:

JAN VISSER

[IDENTITEITSNOMMER 310623 5005 00 8]

(hierna die **OPRIGTER** genoem)

en

CASPERUS AUCAMP

[IDENTITEITSNOMMER 501210 5199 00 4]

en

JAN ROELOF BOOT

[IDENTITEITSNOMMER 290819 5043 00 7]

en

JOHANNES JOACHIM HOWELL

[IDENTITEITSNOMMER 381107 5058 08 8]

en

DIEDERICK JOHANNES SCHUTTE STEYN

[IDENTITEITSNOMMER 450709 5031 08 4]

en

LEONARDUS HIERONIMUS VAN SCHAIK

[IDENTITEITSNOMMER 490303 5125 00 5]

en

BERNARDUS GERHARDUS KUKKUK

[IDENTITEITSNOMMER 350410 5070 00 5]

en

HENDRIK STEPHANUS JOHANNES VORSTER

[IDENTITEITSNOMMER 530220 5060 00 2]

(hierna die **TRUSTEES** genoem)

TEN BEHOEWE VAN:

**DIÉ GEREFORMEERDE KERKE SOOS UITEENGESIT IN DIE
LYS VAN**

MEEWERKENDE KERKE (BYLAE "A") HIERBY AANGEHEG.

IN hulle hoedanigheid as inkomstebegunstigdes

EN die **GEREFORMEERDE KERKE
EMERITAATSVERSORGINGSKOMBINASIE**

IN hulle hoedanigheid as kapitaalebegunstigdes.

AANGESIEN die **OPRIGTER** begerig is om die hierinvermelde trust vir en ten behoeve van die genoemde **BEGUNSTIGDES** te skep onderhewig aan die voorskrifte en voorwaardes soos meer volledig hierin uiteengesit;

EN AANGESIEN die **TRUSTEES** hulleself bereid verklaar het om die skenkings te aanvaar en dit ten behoeve van die **BEGUNSTIGDES** te hou en aan te wend, onderhewig aan die voorwaardes wat deur die oprigter bepaal is en soos dit in die trustakte genotuleer word;

DERHALWE KOM DIE PARTYE SOOS VOLG OOREEN:

1. WOORDOMSKRYWING

In hierdie trustakte, tensy dit uit die samehang anders blyk

1.1. sluit die woorde wat die enkelvoud aandui, ook die meervoud in en omgekeerd; woorde wat die manlike geslag aandui, ook die vroulike geslag in en omgekeerd;

1.2. sal die volgende uitdrukkings die volgende betekenis hê, naamlik:

1.2.1. "Begunstigdes" verwys na Inkomste- sowel as Kapitaalebegunstigdes;

1.2.1.1. "Inkomstebegunstigdes" verwys na dié **GEREFORMEERDE KERKE (VERTEENWOORDIG DEUR KERKRADE)** soos uiteengesit in die lys van meewerkende kerke

(**BYLAE "A"**) hierby aangeheg, welke Gereformeerde Kerke binne die Republiek van Suid-Afrika geleë is en vrygestel is van inkomstebelasting ingevolge Artikel 10(1)(f) van die Inkomstebelastingwet 58 van 1962.

1.2.1.2. "Kapitaalbegunstigdes" verwys na die **GEREFORMEERDE KERKE**

EMERITAATSVERSORGINGSKOMBINASIE, 'n kombinasie van meewerkende kerke soos in **BYLAE "A"** aangetoon, welke Gereformeerde Kerke binne die Republiek van Suid-Afrika geleë is en vrygestel is van inkomstebelasting ingevolge artikel 10(1)(f) van die Inkomstebelastingwet 58 van 1962.

1.2.2. "Trusteiendom" is die bate/bates wat die trust bekom;

1.2.3. "Kapitaal" of "Trustkapitaal" beteken alle en enige bates van die trust, uitgesonderd inkomste, en sluit enige netto inkomste in wat nie verdeel is nie en tot die kapitaal toegevoeg is;

1.2.4. "Meewerkende kerke" is **GEREFORMEERDE KERKE IN SUID-AFRIKA** wat sedert die ontstaan van die **EMERITAATSFONDS** saamgewerk het in die versorging van hulle emeriti, soos vasgestel in 'n lys van meewerkende kerke soos op **30 JUNIE 1994**, waarop die Sinode van 1994 besluit het en soos deur die Sinode van 1997 gepubliseer is (hierby aangeheg en gemerk **BYLAE "A"**), sowel as kerke wat afgestig is of saamgevoeg is uit die kerke vermeld in **BYLAE "A"**.

1.2.5. "Trustakte" of "akte" verwys na hierdie dokument in sy geheel;

1.2.6. "Trustees" beteken die persone wat die trustakte as trustees onderteken het asook alle latere en alternatiewe trustees van tyd tot tyd van die trust;

1.2.7. "Versorgingslys" is die lys van predikante en hulle afhanklikes wat vir versorging deur die meewerkende kerke kwalifiseer, soos uiteengesit in **BYLAE "B"** hierby aangeheg, welke predikante tot **30 JUNIE 1994** kragtens Beroepsbrief geregtig was op emeritaatsversorging uit die Emeritaatsfonds en kragtens 'n besluit van die Nasionale Sinode van 1994 na **1 JULIE 1994** geregtig is op versorging daaruit vir diensjare vóór **1 JULIE 1994**, soos vasgestel in die versorgingslys waarop die Sinode van 1994 besluit het en soos deur die Sinode van 1997 gepubliseer is.

1.2.8. "Gereformeerde Kerke Emeritaatsversorgingskombinasie" 'n kombinasie van meewerkende kerke soos in **BYLAE "A"** (hierby aangeheg) uiteengesit, met die volgende doelstellings:

1.2.8.1. Om die meewerkende kerke van hulp te wees om hulle emeriti eervol te versorg.

1.2.8.2. Om sake rakende die emeritaatsversorging van predikante deur middel van hierdie trust ordelik te reël en te hanteer, en Gereformeerde Kerke te ondersteun in die nakoming van Artikels 13 en 20 van die Kerkorde van Gereformeerde Kerke in Suid-Afrika.

1.2.8.3. Om versorgingsmiddele te bekom by wyse van verpligte ramings, verpligte kollekte en vrywillige bydraes deur Gereformeerde Kerke en individue.

1.2.8.4. Om alle voorkomende sake rakende emeritaatsversorging deur middel van die trust te hanteer.

1.2.8.5. Om die voortgaande werking van die **TRUST** onder die aandag van lidmate te bring, 'n positiewe gesindheid ten opsigte van die **TRUST** by kerke en lidmate te skep en te vra vir vrywillige bydraes.

1.2.9. "Gereformeerde Kerke" is die Gereformeerde Kerke in Suid-Afrika soos hulle op **6 tot 16 JANUARIE 1997** byeenkom in die Nasionale Sinode van Gereformeerde Kerke in Suid-Afrika, sowel as kerke wat afgestig of saamgevoeg is uit gemelde kerke.

1.2.10. Opskrifte dien bloot as verwysing vir gerief en sal geensins gebruik word om die inhoud van die akte te interpreteer nie.

2. NAAM

Die naam van die trust is die **GEREFORMEERDE EMERITAATSVERSORGINGSTRUST.**

3. SKENKING

Die oprigter skenk hiermee aan die trustees die bedrag van **R100,00 (EENHONDERD RAND)** wat onmiddellik die trustees in hulle ampshoedanigheid vestig om deur hulle in trust gehou en geadministreer te word ooreenkomstig die bepalings van hierdie akte, en welke skenking die inisiële **corpus** en kapitaal van die trust sal vorm.

4. VESTIGING VAN REGTE OP TRUSTGOED

By die aanvaarding deur die trustees van hulle trusteeskap hierkragtens, en van die voormelde skenking in die trust, verkry die trustees onmiddellik 'n vorderingsreg teenoor die skenker vir oorhandiging van die bedrag van die skenking, en is hulle geregtig en verplig om toe te sien dat die skenking aan hulle oorhandig word. Tydens die geldigheidsduur van die trust is die trustees verplig om alle bates van die trust en alle titelaktes en dokumente met betrekking tot die trustfonds in besit te neem en in bewaring te hou.

5. AANSTELLING VAN TRUSTEES

5.1. Die eerste trustees wat hiermee aangestel word, is soos in die aanhef hiervan aangewys (en word hierin na verwys as "die eerste trustees").

5.2. Daar moet te alle tye minstens **7 (SEWE)** (*8 (AGT)*) trustees in die amp wees. Die trustees is saamgestel uit die Direkteur van die Administratiewe Buro (*ex officio*) van Gereformeerde Kerke in Suid-Afrika, **3 (DRIE)** (*4 (VIER)*) kundige persone en **3 (DRIE)** (*4 (VIER)*) dienende predikante van meewerkende kerke wat deur die Gereformeerde Kerke Emeritaatsversorgingskombinasie aangewys word, (*met twee sekundi elk vir sowel die kundige persone as die predikante*).

Indien die aantal trustees om welke rede ookal benede die vereiste minimum getal daal, word die getal binne **60 (SESTIG) DAE** deur die Gereformeerde Kerke Emeritaatsversorgingskombinasie aangevul. By vervanging van die trustees deur die Gereformeerde Kerke Emeritaatsversorgingskombinasie moet ter wille van kontinuïteit ten minste **DRIE (3)** van die trustees uit die vorige termyn heraangestel word.

5.3. Slegs natuurlike persone kwalifiseer om as trustees van die trust op te tree.

5.4. Die Gereformeerde Kerke Emeritaatsversorgingskombinasie is geregtig, onderworpe aan die bepalings van klousule **5.3**, om bykomende trustees van hulle keuse te benoem en aan te stel.

5.5. Geen aanstelling of benoeming van 'n trustee sal van krag wees alvorens dit deur sodanige aangestelde of benoemde skriftelik aanvaar is nie.

5.6. Elke trustee, hetsy 'n eerste, toekomstige of opvolgende trustee, sal vrygestel wees van enige verpligting om sekuriteit in verband met sy aanstelling of vir die behoorlike administrasie van die trustfonds aan die Meester van die Hooggeregshof of enige amptenaar soos bepaal in enige Wet wat tans van krag is of wat van krag mag word in verband met die beskerming van trustbates te verskaf, en die Meester en enige sodanige ander amptenaar word hierby versoek om van enige sodanige sekuriteit af te sien.

6. BEËINDIGING VAN DIE AMP VAN TRUSTEE

Die amp van trustee sal onmiddellik en sonder tussenkoms van die Hof beëindig word en vakant wees en die trustkapitaal ophou om in 'n trustee te setel:

6.1. as hy bedank deur skriftelike kennisgewing tot dien effekte aan sy medetrustees te gee;

of

6.2. as hy, na oordeel van die Gereformeerde Kerke Emeritaatsversorgingskombinasie geestelik versteurd of swaksinnig raak;

of

6.3. as hy om enige rede onbevoeg en/of onbekwaam is om as trustee op te tree;

of

6.4. as sy boedel gesekwestreer word, hetsy voorlopig of finaal, of as hy 'n kompromie met sy skuldeisers aangaan of 'n daad van insolvensie pleeg;

of

6.5. as hy kragtens die Maatskappywet wat van tyd tot tyd van krag is, gediskwalifiseer sou word om as direkteur van 'n maatskappy op te tree;

7. OOGMERKE VAN DIE TRUST

Die oogmerke van die trust is:

7.1. Om 'n spesiale fonds in die Republiek van Suid-Afrika in te stel met die enigste oogmerk om deur middel van die Gereformeerde Kerke Emeritaatsversorgingskombinasie fondse te verskaf aan die meewerkende Gereformeerde Kerke (**BYLAE "A"**) vir die versorging van emerituspredikante, emeritus teologiese professore en hulle afhanklikes soos in die versorgingslys (**BYLAE "B"**) uiteengesit, welke meewerkende Gereformeerde Kerke binne die Republiek van Suid-Afrika geleë en vrygestel is van inkomstebelasting ingevolge artikel 10(1)(f) van die Inkomstebelastingwet 58 van 1962.

7.2. Om geld in te samel en bydraes in geld of andersins en hetsy deur middel van skenkings (erflatings of andersins) te aanvaar en dit of die inkomste daarvan vir die oogmerk in sub-paragraaf **7.1** hierbo uiteengesit, te ontvang.

7.3. Alle skenkings aan die trust moet onherroeplik en onvoorwaardelik wees.

7.4. Alle fondse mag slegs aangewend word binne die Republiek van Suid-Afrika.

8. MAGTE EN BEVOEGDHEDE VAN TRUSTEES

Onderworpe aan die bepalinge van paragraaf **7** hierbo, het die trustees die volgende magte en bevoegdhede:

8.1. Die trustkapitaal vestig in die trustees in hulle ampshoedanigheid;

8.2. Die kapitaal en alle magte wat vir die trustees in hierdie akte omskryf word, vestig in die trustees in hulle ampshoedanigheid van trustee ten einde hulle in staat te stel om met die kapitaal en inkomste van die trust te handel ten behoeve van die begunstigdes en nie tot die persoonlike voordeel van die trustees nie. Die omvangrykheid van die magte wat in die trustees setel, moet geïnterpreteer word onderhewig daaraan dat die essensie van 'n trust die bevoordeling van die trustbegunstigdes is.

8.3. Die trustees is geregtig om enige handeling hoegenaamd te verrig wat hulle in hulle diskresie noodsaaklik en/of bevorderlik vir die behoud of groei van die kapitaal van die trust en in belang van die begunstigdes af en sal vir dié doel namens die trust enige handeling mag verrig wat 'n ten volle handelingsbevoegde natuurlike persoon ten opsigte van sy eie sake mag verrig, onderhewig aan die voorskrifte in klousule **10.1** hieronder dat geen besigheid bedryf mag word nie, en onderhewig aan die voorskrifte van klousules **13.6** en **13.7** hieronder;

8.4. sonder inperking van die algemeenheid van die bevoegdhede van die trustee, is die trustees gemagtig om:

8.4.1. 'n bankrekening in die naam van die trust te open, tjeks daarop te trek en gelde daarop te deponeer; wissels en waarborge daarteen te laat uitreik en wissels ten gunste van die trust vir invordering te oorhandig. Vir doeleindes van hierdie sub-paragraaf is die handtekening van minstens twee van die trustees of gevolmagtigdes voldoende vir enige handeling met betrekking tot die bankrekening, mits die bevoegdheid aan 'n enkele trustee verleen, deur 'n behoorlike besluit van die trustees gerugsteun is. "Bankrekening" sluit ook rekeninge by, of enige kredietreëlings met, bank en erkende finansiële instellings in;

8.4.2. goedere van enige aard, roerend en onroerend, liggaamlik of onliggaamlik en waar ookal geleë, insluitende aandele, effekte, fondse, skuldbriewe en sekuriteite te koop, te verkoop of te ruil, en enige kredietooreenkomste en kontrakte van enige aard aan te gaan op sodanige voorwaardes as wat die trustees bepaal, uitgesonderd met die doel om handel te dryf, onderhewig aan die bepaling van klousule **8.5** hieronder;

8.4.3. enige vaste eiendom wat deel van die trustkapitaal uitmaak, te verkoop, te verhuur, te verbeter, te verander en te onderhou,

maar onderworpe aan die bepalings van sub-paragraaf **7.1** hierbo en onderhewig aan die voorskrifte in klousule **10.1** hieronder dat geen besigheid bedryf mag word nie;

8.4.4. by enige verkoop van bates wat deel van die trustkapitaal uitmaak na hulle eie onbepערkte goeddunke sodanige verkoping per openbare veiling, openbare tender of uit die hand te doen en na hulle eie onbepערkte goeddunke krediet te verleen ten opsigte van die hele koopprys of gedeelte daarvan;

8.4.5. enige dokument of aktes met betrekking tot vervreemding, verdeling, ruil, oordrag of andersins in enige akteskantoor, mynbriewekantoor of ander openbare kantoor wat handel met serwitute, vruggebruike, beperkte belange of andersins te verly, en om enige aansoeke te doen, toestemming te verleen en in te stem tot enige wysiging, verandering, rojering, sessie, ontheffing, vermindering, substitusie of enige iets wat in die algemeen betrekking het op enige akte, verband of dokument, en om vir enige doeleindes afskrifte van aktes, verbande of dokumente te verkry, en om in die algemeen enige handeling hoegenaamd in enige sodanige kantoor te doen of te laat doen;

8.4.6. huurgeld in te vorder en huurkontrakte te kanselleer en die nodige stappe te doen vir die uitsetting van 'n huurder uit 'n verhuurde eiendom maar onderworpe aan die bepalings van sub-paragraaf **7.1** hierbo;

8.4.7. gelde wat deel van die trustkapitaal uitmaak teen rente te belê in sodanige sekuriteite en op sodanige wyse en voorwaardes as wat die trustees bepaal, onderhewig aan die bepaling van klousule **8.5** hieronder;

8.4.8. enige belegging wat deel van die trustkapitaal uitmaak in hulle diskresie in daardie vorm te behou of te wysig of te herbelê;

8.4.9. lenings, met rente, en op sodanige voorwaardes as wat die trustees bepaal, aan begunstigdes en ander persone of instansies van die trustees se keuse te maak, met sekuriteit, onderhewig aan die bepalings van klousule **8.5** hieronder;

8.4.10. regsgedinge in te stel, te verdedig of te skik;

8.4.11. vergaderings van skuldeisers van 'n privaat individu, maatskappy of liggaam wat 'n skuldenaar van die trust is, by te

woon, ongeag of die vergadering met insolvensie, likwidasie of geregtelike bestuur verband hou, te stem oor enige sake wat aan die vergadering voorgelê word, en, in die algemeen alle regte wat aan 'n skuldenaar in soortgelyke omstandighede toekom, uit te oefen;

8.4.12. kwitansies, ontheffings of vrywarings te gee ten aansien van enige bedrag of vordering wat ontvang is of waaraan voldoen is;

8.4.13. van die dienste van professionele adviseurs en die Administratiewe Buro van Gereformeerde Kerke in Suid-Afrika vir die sake van die trust gebruik te maak en vir sodanige dienste (indien nodig) uit die trustfonds te betaal;

8.4.14. skenkings of erflatings ten behoeve van die trust van enige iemand te aanvaar, onderhewig aan die bepalinge en voorwaardes van hierdie trustakte, maar spesifiek onderhewig aan die vereiste dat alle skenkings aan die trust onherroeplik en onvoorwaardelik moet wees;

8.4.15. ingeval van 'n maatskappy of effektrust waarvan die statute die oordrag van aandele in naam van die trustees as sodanig verbied, die aandele in hulle persoonlike name, of in die name van hulle benoemdes te laat oordra en te hou as genomineerdes van en ten behoeve van die trust;

8.4.16. kontrakte met hulleself in hulle persoonlike hoedanighede, gesamentlik of afsonderlik, te sluit, mits aan die voorskrifte van sub-paragraaf **12.1** voldoen word;

8.4.17. by die uitoefening van enige van die voormelde bevoegdhede alle dokumente te teken en alle stappe te doen wat nodig mag wees om sinvol aan 'n besondere bevoegdheid uitvoering te gee;

8.4.18. om alle magte, rente en verpligtinge wat hulle kragtens hierdie trustakte verkry, in die Republiek van Suid-Afrika uit te oefen, maar nie buite die Republiek van Suid-Afrika nie.

8.5. Fondse beskikbaar vir belegging ingevolge klousules **8.4.2**, **8.4.7** en **9.5** mag slegs belê word by geregistreerde finansiële instellings soos omskryf in artikel 1 van die Wet op Finansiële Instellings (Belegging van Fondse), 39 van 1984 en in aandele wat

op 'n gelisensieerde effektebeurs soos in die Wet op Beheer van Effektebeurse, 1 van 1985 omskryf, genoteer is.

9. AANWENDING VAN INKOMSTE

Die trust is 'n diskresionêre trust wat die aanwending en tyd van toekenning van trustinkomste betref en die trustees kan die inkomste volgens hulle absolute diskresie toeken of weerhou, behoudens die bepalings van klousules **13.6** en **13.7** hieronder, maar met die uitdruklike bepaling dat 75% van die netto inkomste van die trust aan die meewerkende Gereformeerde Kerke as inkomstebegunstigdes (soos omskryf in paragraaf **1.2.1.1** hierbo) soos beoog in artikel 10(1)(f) van die Inkomstebelastingwet 58 van 1962 uitgekeer word binne 'n tydperk van **TWAALF [12] MAANDE** vanaf die einde van die finansiële jaar waartydens bedoelde inkomste verkry is. Dit is 'n uitdruklike voorwaarde dat slegs dié meewerkende kerke waarop 'n verpligting rus om emeritus predikante of hulle afhanklikes soos uiteengesit in die versorgingslys (**BYLAE "B"** hierby aangeheg) te versorg, kwalifiseer vir sodanige toekenning uit die inkomste van die trust.

Die trustees is meer afsonderlik geregtig om:

9.1. alle kostes en uitgawes met die administrasie van die trust uit die inkomste van die trust te betaal en na die saldo van die oorblywende inkomste word hierin later verwys as die "netto inkomste";

9.2. enige periodieke ontvangste as inkomste te behandel, nieteenstaande dit van kwynende bates afkomstig is, en is nie verplig om vir die vervanging daarvan voorsiening te maak nie;

9.3. op sodanige wyse as wat hulle mag goed dink en in hulle absolute diskresie te besluit of enige ontvangste as inkomste of kapitaal beskou moet word en of enige uitgawes ten opsigte van die trust aangegaan, uit inkomste of kapitaal betaal moet word en die besluit van die trustees sal finaal en bindend wees en daar sal geen appèl daarteen wees nie;

9.4. wanneer enige gedeelte van die netto inkomste te enige tyd ingevolge hierdie akte uitbetaal word, dit in kontant of in goedere, of gedeeltelik in kontant en gedeeltelik in goedere te betaal;

9.5. tot en met die beëindiging van die trust van tyd tot tyd en te enige tyd die deel van die trust se jaarlikse netto inkomste wat nie tot die voordeel van die begunstigdes aangewend word nie, op te hoop vir aaneenlopende of ononderbroke tydperke soos wat die trustees mag goed dink, deur dit en die inkomste wat daaruit ontstaan, te belê in enige beleggings hierkragtens gemagtig en om enige ophopings aldus gedoen as deel van die trustkapitaal te hou vir al die doeleindes hiervan, maar sodat die trustees te enige tyd en van tyd tot tyd in hulle algehele diskresie die gehele of enige gedeeltes van die gesegde ophoping mag aanwend asof dit inkomste was wat in die dan lopende jaar ontstaan het, maar onderworpe aan die bepalings van klousules **7.1** en **8.5** hierbo;

9.6. die inkomste en eiendom van die trust, uit welke bron ookal verkry, word uitsluitlik aangewend vir die bevordering van die oogmerke van die trust soos in **7.1** hierbo uiteengesit, en geen gedeelte daarvan mag regstreeks of onregstreeks, by wyse van dividend, bonus of andersins aan die begunstigdes van die trust of persone vermeld in die versorgingslys betaal of oorgemaak word nie, met dien verstande dat dit slegs aan die Gereformeerde Kerke Emeritaatsversorgingskombinasie betaal word om in ooreenstemming met hulle reglemente en in terme van die trustdoel tot voordeel van die begunstigdes aan te wend;

9.7. niks wat hierin bepaal is, belet die betaling ter goedertrou van redelike besoldiging aan 'n beampte of diensnemer van die trust of aan 'n begunstigde daarvan vir dienste werklik aan die trust gelewer nie.

10. AANWENDING VAN KAPITAAL

10.1. Die trust mag geen besigheid bedryf nie. Dit sluit in, onder andere, gewone handelsaktiwiteite, spekulatiewe transaksies asook die aankoop van eiendom met die bedoeling om 'n huurinkomste daaruit te verkry.

10.2. Die trustees sal geregtig wees om in hulle absolute diskresie:

10.2.1. enige betalings van hulle ingevolge sub-paragraaf **9.1** hierbo gemagtig is om te maak, uit die trustkapitaal te doen as daar nie voldoende fondse uit die trustinkomste vir dié doel beskikbaar is nie;

10.2.2. te enige tyd en van tyd tot tyd en tot met die beëindiging van die trust, die geheel of enige gedeelte of gedeeltes van die kapitaal van die trust aan te wend tot die voordeel van die begunstigdes en op sodanige wyse en onderhewig aan sodanige voorwaardes en beperkings as wat die trustees van tyd tot tyd in hulle algehele diskresie mag bepaal, behoudens die voorskrifte van klousules **13.6** en **13.7** hieronder.

11. DISKRESIONÊRE MAGTE VAN TRUSTEES

11.1. Die diskresionêre magte ingevolge hierdie akte aan die trustees verleen, is absoluut en onbelemmerd behalwe waar dit uitdruklik beperk of ingekort word.

11.2. Nieteenstaande enigiets tot die teendeel hierin vervat of geïmpliseer, sal die trustees nie enige diskresie of bevoegdheid op sodanige wyse uitoefen dat die dienende trustees en/of hulle familieledede enige voordele uit die inkomste of fondse van die trust ontvang nie.

12. BELANGE VAN TRUSTEES

12.1. Enige trustee mag alle bevoegdhede en diskresies hierkragtens of regtens aan hom verleen, uitoefen en met die uitoefening daarvan saamstem nieteenstaande hy 'n direkte of ander persoonlike belang in die wyse of gevolg van die uitoefening van sodanige bevoegdheid of diskresie mag hê, maar enige trustee mag, nieteenstaande, maar sonder enige verpligting, as hy so verkies, hom weerhou van optrede anders as slegs 'n formele party in enige saak waarin hy aldus 'n persoonlike belang mag hê en mag sy mede-trustee of -trustees toelaat om alleen op te tree in die uitoefening van die bevoegdhede en diskresies voormeld met betrekking tot sodanige aangeleentheid.

12.2. Elke trustee wat sodanige belang het by enige handeling wat die trust raak, sal egter verplig wees om die aard en omvang van sy belang vooraf skriftelik aan sy medetrustees te openbaar.

13. PLIGTE VAN TRUSTEES

Sonder om enigsins die algemeenheid van die trustees se fidusiêre pligte in te perk, sal hulle besonderlik verplig wees om:

13.1. die skenking ingevolge paragraaf 3 gemaak, op te volg en in ontvangs te neem;

13.2. onmiddellik 'n bank- of soortgelyke rekening by 'n erkende finansiële instelling op naam van die trust te open en alle gelde wat die trust toekom in die eerste instansie op sodanige rekening te deponer;

13.3. alle bates van die trust en alle titelaktes en dokumente met betrekking tot die trust in besit te neem en in bewaring te hou;

13.4. behoorlik boek te hou of te laat hou van die sake van die trust en uitvoering te gee aan die voorskrifte van sub-paragraaf 14.1;

13.5. nie oor enige bates van die trust vir hulle eie voordeel of die voordeel van hulle boedels te beskik nie, behalwe soos uitdruklik andersins bepaal in hierdie akte, en sal die boedel, bates, rekeninge en sake van die trust apart van dié van die trustees gehou, beheer en administreer word. Alle roerende, onroerende en verhandelbare bates, dokumente, beleggings, saketransaksies en besigheid moet in die naam van die trust geregistreer word en geskied of in die naam van die trustees, maar dan met aanduiding dat dit ten behoeve van en in hul hoedanigheid van die trustees van die trust is;

13.6. alle opdragte en besluite van die Gereformeerde Kerke Emeritaatsversorgingskombinasie in ooreenstemming met die trustdoel uit te voer;

13.7. die doelstellings van die Gereformeerde Kerke Emeritaatsversorgingskombinasie in die tydperk tussen die vergadering daarvan in ooreenstemming met die trustdoel te verwesenlik;

13.8. die "ordereëling vir emeritaatsversorging met behulp van die Emeritaatstrust" in ooreenstemming met die trustdoel na te kom;

13.9. die trustees sal onthef wees van enige verdere verantwoordelikheid ten opsigte van enige deel van die trustkapitaal of -inkomste by beëindiging van die trust.

14. PROFESSIONELE DIENSTE

14.1. Die trustee moet, indien daartoe deur enige begunstigde of trustee versoek, 'n ouditeur aanstel om as ouditeur van die trust op te tree. Aan die einde van elke finansiële jaar sal die trustee 'n rekening van die administrasie van die trust laat opstel waarin die kapitaal van die trust uiteengesit word met alle byvoegings daartoe en alle inkomstes en uitgawes deur die trustee aangegaan en die wyse waarop dit alles gehou en belê is. Elke begunstigde of sy regsvertegenwoordiger sal op versoek geregtig wees op 'n gewaarmerkte afskrif van elke sodanige rekening, behoorlik deur twee trustee en die ouditeur gesertifiseer.

14.2. Die trustee is geregtig om van die dienste van professionele persone en/of die Administratiewe Buro van die Gereformeerde Kerke in Suid-Afrika gebruik te maak in soverre hulle sodanige dienste noodsaaklik of wenslik ag vir die doeleindes van die trust en daarvoor uit die trust se fondse te betaal.

14.3. Die feit dat 'n trustee 'n professionele beoefening of besigheid bedryf, sal geen beletsel vir hom of sy firma wees om in professionele of ander hoedanigheid opdragte van die trust te ontvang en uit te voer en daarvoor vergoed te word nie ewe asof hy nie 'n trustee is nie.

15. PERSOONLIKE AANSPREEKLIKHEID VAN TRUSTEES

'n Trustee is nie persoonlik aanspreeklik vir enige verlies wat die trust mag ly nie, ongeag die rede daarvoor, tensy sodanige verlies uit 'n opsetlike onregmatige handeling of late of die growwe nalatigheid van 'n trustee voortspruit. 'n Trustee is nie vir 'n bedrieglike handeling van 'n medetrustee aanspreeklik nie tensy daar samespanning tussen die trustee was.

16. VERGOEDING VAN TRUSTEES

Die trustee sal nie geregtig wees op enige vergoeding vir hulle dienste as sodanig nie.

17. ADMINISTRATIEWE FUNKSIES EN BEVOEGDHEDE VAN TRUSTEES

17.1. Onderhewig daaraan dat die trustees deurgaans gevolg sal gee aan die doelstellings van die trust, is hulle geregtig om in die behartiging en administrasie van die sake van die trust sodanige beleidsrigtings te volg en prosedures neer te lê en administratiewe stappe te neem as wat hulle van tyd tot tyd wenslik mag ag, met die voorbehoud dat die prosedure soos deur die Gereformeerde Kerke Emeritaatsversorgingskombinasie voorgeskryf, nagekom moet word.

17.2. Die voorsitter van die trustees word deur die Gereformeerde Kerke Emeritaatsversorgingskombinasie aangewys.

17.3. Ten opsigte van vergaderings van trustees geld die volgende voorskrifte:

17.3.1. Die trustees vergader so dikwels as wat nodig mag wees om die sake van die trust behoorlik te behartig.

17.3.2. Die kworum van die trustees is **VIER (4)** lede.

17.3.3. Besluite word by volstreekte meerderheid van stemme geneem op die wyse en volgens die prosedure deur die Voorsitter bepaal.

17.3.4. By staking van stemme het die Voorsitter nie 'n beslissende stem nie.

17.3.5. Enige trustee is te alle tyd geregtig om met 'n **VEERTIEN (14) DAE** skriftelike kennisgewing aan alle trustees die trustees vir 'n vergadering byeen te roep.

17.4. Indien 'n volstreekte meerderheidstem nie in verband met die saak verkry kan word nie, word die aangeleentheid verwys na die Gereformeerde Kerke Emeritaatsversorgingskombinasie. Die besluit van die meerderheid van die Gereformeerde Kerke Emeritaatsversorgingskombinasie is finaal en bindend op die trustees.

17.5. 'n Besluit wat op skrif gestel is en deur al die trustees onderteken is, het dieselfde regsrag as 'n besluit op 'n behoorlike gekonstitueerde vergadering geneem.

17.6. Die trustees is verplig om alle besluite aangaande die trustakte binne **EEN (1) MAAND** in 'n notuleboek aan te teken en in dié verband sal dieselfde prosedure gevolg word as wat maatskappye verplig is om te volg ingevolge artikel 204 van die Maatskappywet nommer 61 van 1973 (of latere wysigings daarvan).

17.7. Die trustees vergader so dikwels as wat nodig mag wees om besluite oor die aanwending en/of toekennings van die inkomste wat in die trust verdien is te neem. Sodanige vergadering word vir alle doeleindes geag 'n vergadering te wees waarvan die besluite geneem is op die laaste dag van die betrokke finansiële jaar van die trust.

17.8. Die trustees is geregtig om twee of meer van hulle te magtig om alle dokumente vir amptelike doeleindes wat nodig is by die administrasie van die trust en ter uitvoering van enige transaksie wat verband hou met die trust se sake namens die trustees te teken, en enige besluit wat deur 'n trustee gesertifiseer is as 'n ware uittreksel uit die notule van 'n besondere besluit van die trustees, het in alle opsigte die regskrag van 'n besluit geteken deur al die trustees.

17.9. Die trustees moet jaarliks finansiële state aan die Gereformeerde Kerke Emeritaatsversorgingskombinasie verskaf en moet te alle redelike tye die Gereformeerde Kerke Emeritaatsversorgingskombinasie in staat stel om die finansiële state en boeke van die trust na te gaan.

17.10. Die trustees is te alle tye aan die Gereformeerde Kerke Emeritaatsversorgingskombinasie verantwoordig verskuldig vir die uitvoering van hulle pligte, opdragte en verantwoordelikhede.

18. BEPALINGS TEN AANSIEN VAN BEGUNSTIGDES

18.1. Die begunstigdes is soos aangewys in die aanhef van hierdie akte gelees met sub-paragraaf **1.2.1**.

18.2. Nieteenstaande enige iets anders tot die teendeel in hierdie akte bepaal, sal geen dienende trustees te enige tyd as 'n inkomste- of kapitaalbegunstigde van hierdie trust kwalifiseer of as sodanig enige voordele ontvang vir solank as wat hy in die gees en bewoording van artikel 3(3)(d) van die Boedelbelastingwet 45 van 1955, of enige latere wysiging daarvan, bevoeg is om vir sy

eie voordeel of vir die voordeel van sy boedel oor trustbates te beskik nie.

18.3. Met uitsondering van 'n trustee wat ageer namens 'n trust waarvan die begunstigdes uitsluitlik natuurlike persone is en mag wees, mag slegs natuurlike persone enige voordeel uit hierdie trust ontvang.

18.4. BEPERKINGS

18.4.1. Geen bepalinge in hierdie trustakte moet so gelees word dat enige bates of inkomste van die trust in enige begunstigde vestig nie.

18.4.2. Aangesien hierdie 'n diskresionêre trust is en die trustkapitaal in die trustees in hulle amptelike hoedanigheid vestig, het die begunstigdes geen vorderingsreg ten opsigte van die kapitaal of inkomste van die trust en het hulle geen reg om tydens die geldigheidsduur van die trust enigsins met die kapitaal of inkomste van die trust te handel nie.

18.4.3. Die kapitaal en inkomste van die trust is nie vir beslaglegging van die skulde van 'n begunstigde vatbaar nie.

19. TOEVOEGINGS TOT DIE TRUSTFONDS

19.1. Die oprigter sal geregtig wees om te enige tyd toevoegings tot die kapitaal van die trust te maak, hetsy by wyse van skenking, bemaking of op enige ander wyse.

19.2. Indien enige ander persoon insgelyks enige bydrae tot die trustkapitaal sou maak, sal die trustees die keuse hê om dit te aanvaar of nie.

19.3. Alle toevoegings tot die trustkapitaal sal te alle tye onderhewig wees aan die terme en voorwaardes van hierdie akte.

20. BEËINDIGING VAN DIE TRUST

20.1. Die trustees kan te enige tyd in opdrag van die Gereformeerde Kerke Emeritaatsversorgingskombinasie die trust beëindig.

20.2. By die beëindiging van die trust word die bates van die trust wat oorbly na voldoening aan al sy verpligtinge gegee of oorgemaak aan die Gereformeerde Kerke Emeritaatsversorgingskombinasie ten behoeve van die meewerkende kerke soos in **BYLAE "A"** uiteengesit, welke kerke binne die Republiek van Suid-Afrika geleë is en wat ook vrygestel is van inkomstebelasting ingevolge artikel 10(1)(f) van die Inkomstebelastingwet 58 van 1962.

21. WYSIGING VAN TRUSTAKTE

21.1. Geen bepaling van die trust kan gewysig word of daaraan toegevoeg word deur 'n besluit geneem deur die trustees nie. Die trustakte kan slegs gewysig word deur 'n 80% meerderheidsbesluit van die ledevergadering van die Gereformeerde Kerke Emeritaatsversorgingskombinasie, soos uiteengesit in die lys van meewerkende kerke (**BYLAE "A"**), en kerke wat uit gemelde meewerkende kerke afgestig of saamgevoeg is.

21.2. Die versorgingslys (**BYLAE "B"**) en die lys van meewerkende kerke (**BYLAE "A"**) mag nie deur die Gereformeerde Kerke Emeritaatsversorgingskombinasie gewysig word nie, met die uitsondering dat persone wat nie meer kwalifiseer vir versorging in terme van toepaslike artikels van die Kerkorde en die Ordereëling vir Emeritaatsversorging van die Gereformeerde Kerke Emeritaatsversorgings-kombinasie nie, se name van **BYLAE "B"** verwyder kan word, en met uitsondering dat kerke wat uit die meewerkende kerke afgestig of saamgevoeg is by die lys van meewerkende kerke (**BYLAE "A"**) gevoeg kan word en kerke wat ontbind het, van gemelde lys verwyder kan word.

21.3. Hierdie reg tot wysiging is egter onderhewig daaraan dat die bepalings van sub-paragraaf **18.3** nooit gewysig mag word nie.

21.4. Enige wysiging van die trustakte moet aan die Kommissaris van Binnelandse Inkomste vir goedkeuring voorgelê word.

**ALDUS GEDOEN en GETEKEN te POTCHEFSTROOM OP
HIERDIE DAG VAN 1996.**